

PRIJEDLOG

U skladu sa članom 24. i 28. Zakona o principima lokalne samouprave u Federaciji Bosne i Hercegovine („Sl. Novine FBiH“ broj: 49/06 i 51/09), članom 59. do 77. Statuta Općine Travnik (prečišćeni tekst „Sl. novine Općine Travnik“ broj: 11/05) i Odlukom o organizaciji i funkcionisanju mjesnih zajednica na području Općine Travnik („Sl. novine Općine Travnik“ broj: 8/2001), na prijedlog Savjeta Mjesne zajednice Centar, Skupština MZ na sjednici održanoj dana _____, 2020. godine **u s v a j a**

STATUT **Mjesne zajednice Centar**

I – OPĆI DIO

Član 1.

Mjesna zajednica Centar (u daljem tekstu MZ Centar) ima svojstvo pravnog lica u okviru prava i dužnosti utvrđenih Zakonom o principima lokalne samouprave i drugim zakonima, Statutom Općine Travnik i ovim Statutom.

Mjesna zajednica ima svoj statut i pečat.

Pečat MZ Centar je u obliku kruga, prečnika 30 milimetara, sa tekstom ispisanim latinicom u koncentričnom krugu: **OPĆINA TRAVNIK – MJESNA ZAJEDNICA** i tekstom u sredini pečata: **CENTAR br.34.**

Član 2.

Pečat MZ upotrebljava i čuva predsjednik Savjeta, u njegovoj odsutnosti lice koje pismenim aktom ovlasti.

U posebnim slučajevima pečat se upotrebljava i čuva na način određen posebnim aktom općinske službe nadležne za poslove rada mjesnih zajednica.

Član 3.

MZ Centar ima Statut, koji na prijedlog Savjeta usvaja Skupština mjesne zajednice, a izuzetnim slučajevima prijedlog za usvajanje Statuta može podnijeti i općinska služba nadležna za poslove rada MZ.

Statut mjesne zajednice je usvojen ako je za njega glasala većina članova Skupštine mjesne zajednice.

Član 4.

Statutom mjesne zajednice, u skladu sa zakonom i Statutom Općine Travnik, uređuje se: postupak osnivanja mjesne zajednice, područje koje obuhvata, nadležnost MZ, organi mjesne zajednice i njihova nadležnost, način njihova izbora i opoziva, način finansiranja djelatnosti mjesne zajednice, postupak provođenja lokalnoga referenduma, odnos prema Općini i njenim organima, kao i odnos prema pravnim licima na području mjesne zajednice te druga pitanja značajna za organizaciju i rad mjesne zajednice.

II – POSTUPAK OSNIVANJA MZ

Član 5.

Mjesnu zajednicu osnivaju građani na zborovima građana, a inicijativu za osnivanje mjesne zajednice mogu podnijeti: građani, njihove organizacije i udruženja, općinski načelnik i Općinsko vijeće Travnik.

Konačnu odluku o osnivanju mjesne zajednice donosi Općinsko vijeće Travnik.

Član 6.

O prijedlogu za osnivanje mjesne zajednice glasa se na zborovima građana ulica i trgova za koje se osniva mjesna zajednica.

Glasanje na zborovima građana se provodi javno.

Odluka o osnivanju mjesne zajednice je prihvaćena ako je za nju glasala natpolovična većina birača upisanih u birački spisak ulica i trgova za čije područje se osniva mjesna zajednica.

Član 7.

Prilikom osnivanja MZ osnivački odbor priprema Statut mjesne zajednice i druge akte MZ, organizuje i provodi izbore za Skupštinu i Savjet mjesne zajednice najkasnije u roku od 60 dana od dana donošenja odluke o osnivanju mjesne zajednice.

III - PODRUČJE MZ CENTAR

Član 8.

Mjesna zajednica Centar obuhvata područje ulica: Bašbunar , Bosanska, Čabruša, Donja čaršija, Donja mahala, Erika Brandisa, Fatmić, Gimnazijska, Glavica, Hadži Ali bega Hasanspahića, Ilhamijina, Konatur, Krndija, Kulina bana, Lončarica, Lukačka, Mali trg, Mehmed paše Kukavice, Poturmahala, Prnjavor, Šehida, Vezirska i Zenjak i trg Lajpcig.

Granice rubnih ulica i trgova predstavljaju granicu MZ Centar sa susjednim mjesnim zajednicama.

Sjedište MZ Centar je u Ulici Čabruša bez broja, Općina Travnik.

Član 9.

U interesu bolje organizacije rada unutar MZ Centar se osnivaju mjesna područja:

1. Poturmahala sa pripadajućim ulicama: Poturmahala, Ilhamijina, Šehida i Lončarica,
2. Stanična sa pripadajućim ulicama: Stanična, Kulina bana, Bašbunar, Prnjavor i Trg Lajpcig,
3. Bosanska sa pripadajućim ulicama: Bosanska, Gimnazijska, Glavica i Vezirska,
4. Erika Brandisa sa pripadajućim ulicama: Erika Brandisa, Donja mahala, Donja čaršija i Mali trg,
5. Konatur sa pripadajućim ulicama: Konatur, Hadži Ali bega Hasanspahića, Mehmed paše Kukavice, Krndija i Lukačka,

6. Čabruša sa pripadajućim ulicama: Čabruša, Fatmić i Zenjak.

Mjesna područja su sjedišta zborova građana i imaju status izbornih jedinica unutar MZ Centar.

IV – NADLEŽNOSTI MZ

Član 10.

Mjesna zajednica svoja prava i dužnosti ostvaruje u skladu sa Zakonom, Statutom Općine Travnik, Odlukom o organizaciji i funkcionisanju mjesnih zajednica na području Općine Travnik i Statutom MZ Centar.

Član 11.

U okviru prava i dužnosti MZ Centar je nadležna za obavljanje poslova koji neposredno utiču na svakodnevne potrebe građana:

1. raspisivanje referenduma za područje MZ,
2. pokretanje i učešće u javnoj raspravi o Budžetu Općine Travnik,
3. pripreme i donošenja urbanističkih planova za području mjesne zajednice,
4. pokretanje i učešće u raspravama o inicijativama i aktivnostima za razvoj privrede i društvenih djelatnosti,
5. izgradnju i održavanje puteva, kanalizacije, vodovoda, rasvjete i drugih komunalnih potreba,
6. uređenje naselja, izgradnju i održavanje parkova, dječijih igrališta, sportskih objekata i dr.,
7. izgradnju i održavanje grobalja i mezarja,
8. čišćenje javnih površina, odvoz smeća, odvođenje atmosferskih voda i zaštitu okoliša,
9. obavljanje i drugih lokalnih poslova od interesa za život i rad građana u mjestu stanovanja, određene Statutom MZ, Zakonom, Statutom Općine Travnik i drugim propisima Općine.

V – ORGANI MZ, NADLEŽNOSTI I NAČIN IZBORA

Član 12.

Organi mjesne zajednice, njihova nadležnost i međusobni odnosi definisani su Statutom MZ Centar, kojeg na prijedlog Savjeta usvaja Skupština MZ.

U uslovima privremenog nefunkcionisanja Savjeta MZ prijedlog Statuta Skupštini može pripremiti i podnijeti općinska služba nadležna za poslove rada mjesnih zajednica.

Statut mjesne zajednice je usvojen ako je za njega glasala većina članova Skupštine mjesne zajednice.

Član 13.

Organi MZ Centar su: zborovi građana, Skupština i Savjet MZ

a) Zbor građana

Član 14.

Zbor građana je neposredan oblik odlučivanja građana, na kojem se odlučuje o pitanjima od značaja za život i rad, te o zajedničkim interesima i potrebama mjesnog područja.

Zbor građana može davati inicijative, prijedloge i mišljenja za rješavanje određenih pitanja iz nadležnosti Općinskog vijeća Travnik, te o nacrtima odluka i drugih dokumenata Općinskog vijeća.

Član 15.

Zbor građana mjesnog područja saziva i njime rukovodi predsjednik Skupštine MZ, a način rada i odlučivanja na zborovima građana detaljnije se uređuje Poslovníkom o radu zbora građana.

U izuzetnim slučajevima i u uslovima nefunkcionisanja organa MZ Centar zbor građana može sazvati i istim rukovoditi ovlašteni predstavnik Općine Travnik.

Član 16.

Zborovi građana organizuju se u slijedećim mjesnim područjima:

1. Poturmahala sa pripadajućim ulicama: Poturmahala, Ilhamijina, Šehida i Lončarica,
2. Stanična sa pripadajućim ulicama: Stanična, Kulina bana, Bašbunar i Prnjavor,
3. Bosanska sa pripadajućim ulicama: Bosanska, Gimnazijska, Glavica i Vezirska,
4. Erika Brandisa sa pripadajućim ulicama: Erika Brandisa, Donja mahala, Donja čaršija i Mali trg,
5. Konatur sa pripadajućim ulicama: Konatur, Hadži Ali bega Hasanspahića, Mehmed paše Kukavice, Krndija i Lukačka,
6. Čabruša sa pripadajućim ulicama: Čabruša, Fatmić i Zenjak.

Član 17.

Zborovi građana organizovani u mjesna područja imaju status izbornih jedinica unutar MZ Centar.

b) Skupština mjesne zajednice

Član 18.

Skupština MZ je organ mjesne zajednice u kojem građani posredno, preko izabranih delegata mjesnih područja, odlučuju o pitanjima od značaja za život i rad, te o zajedničkim interesima i potrebama mjesnih područja.

Skupština mjesne zajednice se formira na predstavničkom principu i broji 43 delegata, koji se biraju u mjesnim područjima proporcionalno broju birača na biračkom spisku tih područja.

Član 19.

Skupština mjesne zajednice nadležna je za obavljanje poslova koji neposredno utiču na svakodnevne potrebe građana za život i rad, kao što su:

1. raspisivanje referenduma području MZ o poslovima iz svoje nadležnosti,

2. izgradnja i održavanje puteva, kanalizacije, vodovoda i drugih komunalnih potreba,
3. uređenje naselja, izgradnja i održavanje parkova, nasada, dječijih igrališta te sportskih objekata i sl.,
4. izgradnja i održavanje grobalja,
5. čišćenje javnih površina, odvoz smeća, odvođenje atmosferskih voda i zaštita okoliša,
6. obavljanje i drugih lokalnih poslova od interesa za život i rad građana u mjestu stanovanja, određenih Statutom mjesne zajednice i općinskim propisima.

Član 20.

Skupštinu MZ Centar čine delegati izabrani u mjesnim područjima, na broj pozicija koje su Statutarnom odlukom MZ predviđeni za to mjesno područje.

Član 21.

Skupština iz reda delegata, natplovičnom većinom prisutnih delegata, bira predsjednika Skupštine, vodeći računa da predsjednik skupštine i savjeta nisu iz istog mjesnog područja, niti iz reda istog konstitutivnog naroda i ostalih.

Kvorum za sazivanje Skupštine mjesne zajednice predstavlja natpolovična većina izabranih delegata Skupštine.

Mandat delegata i predsjednika Skupštine traje dvije godine.

Član 22.

Predsjednik Skupštine MZ Centar:

1. saziva sjednice Skupštine mjesne zajednice i predsjedava im,
2. predsjedava svim zborovima građana,
3. stara se o blagovremenom usvajanju Finansijskog plana i Godišnjeg finansijskog obračuna,
4. usmjerava rad Savjeta MZ,
5. u odsustvu predsjednika Savjeta predstavlja MZ, te obavlja i druge poslove iz svoje nadležnosti.

c) Savjet mjesne zajednice

Član 22.

Savjet MZ je organ mjesne zajednice u kojem građani posredno, preko izabranih članova savjeta iz mjesnih područja, odlučuju o pitanjima od značaja za život i rad, te o zajedničkim interesima i potrebama mjesnih područja.

Savjet MZ Centar ima deset članova i predsjednika Savjeta, koji je po položaju član Savjeta MZ.

Sastav Savjeta MZ Centar odražavat će približnu teritorijalnu, nacionalnu, polnu i drugu strukturu birača upisanih na centralnom biračkom spisku za područje MZ Centar.

Sjednicama Savjeta MZ Centar može prisustvovati i predsjednik Skupštine, koji ima pravo diskusije po svim tačkama dnevnog reda, ali bez prava glasa.

Član 23.

Članove i predsjednika Savjeta MZ bira Skupština mjesne zajednice tajnim glasanjem ili na drugi način utvrđen Statutom i odlukama Skupštine MZ.

Kvorum za sazivanje Savjeta mjesne zajednice predstavlja natpolovična većina izabраниh članova Savjeta.

Mandat članova i predsjednika Savjeta traje dvije godine.

Član 24.

Savjet mjesne zajednice:

1. donosi program rada, finansijski plan i godišnji obračun,
2. poslovnik o radu savjeta mjesne zajednice,
3. predlaže godišnji Plan rada i utvrđuje Izvještaj o radu, te obavlja i druge poslove koji su značajni za ostvarivanje zajedničkih interesa i potreba građana s područja MZ, utvrđenih statutom mjesne zajednice.

Član 25.

Predsjednik Savjeta MZ Centar:

1. predstavlja MZ,
2. saziva sjednice Savjeta mjesne zajednice i predsjedava im,
3. izrađuje i provodi program rada i finansijski plan,
4. prati i koordinira akcije i planove MZ,
5. prati i koordinira realizaciju projekata Općine Travnik i drugih državnih organa i ustanova na području MZ Centar,
6. stara se o izradi Finansijskog plana i Godišnjeg finansijskog obračuna, te obavlja i druge poslove utvrđene Statutom MZ.

Predsjednik Savjeta MZ za svoj rad odgovara Savjetu i Skupštini MZ Centar, a za obavljanje poslova iz samoupravnog djelokruga Općine koji budu preneseni u nadležnost MZ odgovara općinskom načelniku.

Član 26.

Način rada, odlučivanja Skupštine i Savjeta MZ, te pitanja međusobnog odnosa i saradnje, koja nisu uređena ovim Statutom, uređuju se Poslovníkom o radu Skupštine i Savjeta MZ.

Prijedlog Poslovníka o radu Skupštine MZ izrađuje predsjednik Skupštine, a prijedlog Poslovníka o radu Savjeta predsjednik Savjeta.

Član 27.

Za delegata Skupštine MZ, člana i predsjednika Savjeta MZ može biti izabran svaki građanin koji je stalno nastanjen na području mjesne zajednice, ima biračko pravo i koji nije pravosnažno osuđen na zatvorsku kaznu.

Član 28.

Predsjednik Skupštine i predsjednik Savjeta ne mogu biti birani iz reda istog konstitutivnog naroda i reda ostalih.

Član 29.

Približna teritorijalna, nacionalna, polna i druge zastupljenosti mjesnih područja (ulica i trgova) u organima MZ Centar definisat će se Statutarnom odlukom Skupštine MZ Centar, svaki puta 60 kalendarskih dana prije raspisivanja izbora za organe MZ, te će se u formi Javnog poziva obznaniti biračima MZ.

VII – POSTUPAK PROVOĐENJA LOKALNOG REFERENDUMA

Član 30.

Lokalni referendum može biti organizovan radi izjašnjavanja građana o pitanjima iz nadležnosti mjesne zajednice i pitanjima za koja izjašnjavanje zatraži Općine Travnik.

Način organizacije referenduma, način glasanja, zbrajanja i vrednovanja rezultata referenduma, uz suglasnost Općine Travnik, propisat će se posebnim pravilima mjesne zajednice.

Član 31.

Na lokalnom referendumu se izjašnjavaju građani upisani na Centralnom biračkom spisku za područje MZ Centar.

Referendum se smatra uspješnim ako je izlaznost birača 50% plus jedan birač.

VIII – ODNOS MZ PREMA OPĆINI TRAVNIK, PREDUZEĆIMA, USTANOVAMA I UDRUŽENJIMA

Član 32.

Organi MZ Centar imaju obavezu saradnje sa nadležnim općinskim službama, načelnikom Općine i Općinskim vijećem po pitanjima iz njihove nadležnosti.

U pogledu prenesenih nadležnosti organi MZ Centar ispunjavaju svoju ulogu i obavezu na način propisan odlukama Općinskog vijeća o prijenosu nadležnosti..

Član 33.

Organi MZ Centar imaju obavezu pomagati rad udruženja građana, grupe građana, preduzeća i ustanova u realizaciji projekata i akcija od obostranog interesa.

IX – FINANSIRANJE DJELATNOSTI MZ

Član 34.

Sredstva za finansiranje djelatnosti mjesne zajednice osiguravaju se:

1. Lokalnim samodoprinom,
2. Sredstvima koja Općina ustupi mjesnoj zajednici za finansiranje određenih poslova,
3. Prihodom od radnji i preduzeća koje, u skladu sa zakonom, osniva mjesna zajednica,
4. Naknadama za usluge koje pruža mjesna zajednica,

5. Od poklona, donacija i drugih sredstava koja, u skladu sa zakonom i drugim propisima, ostvari mjesna zajednica

Član 35.

MZ Centar donosi:

1. Program rada,
2. Finansijski plan mjesne zajednice,
3. Godišnji finansijski obračun,
4. Operativne planove i projekte sa finansijskim pokazateljima,
5. Liste materijalno – tehničkih sredstava, te druge materijalno – finansijske dokumente.

X – NADZOR

Član 36.

Nadzor nad zakonitošću rada organa MZ obavljaju: Skupština i predsjednik Savjeta MZ, općinska služba nadležna za poslove rada MZ i općinski načelnik.

Općinski načelnik ima pravo i obavezu predložiti Općinskom vijeću da raspusti skupštinu mjesne zajednice i savjet mjesne zajednice te da u roku od 30 dana raspiše nove izbore ako se utvrdi da u svom radu učestalo krše Statut mjesne zajednice ili općinske propise, ili ne obavljaju povjerene poslove.

Član 37.

Odredbe ovog Statuta usklađene su sa Zakona o principima lokalne samouprave u Federaciji Bosne i Hercegovine, Statutom Općine Travnik i Odlukom o organizaciji i funkcionisanju mjesnih zajednica na području Općine Travnik, isti je usvojen i stupa na snagu danom donošenja.

Travnik: _____ 2020. godine

PREDSJEDNIK SKUPŠTINE